

金
華
游
錄

方
鳳
撰

中
華
書
局

叢書集成初編

漱水誌（及其他二種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

叢書集成初編所選寶顏
堂秘笈及學海類編皆收
有此書寶顏本撰人誤作
謝翱當從學海本作方鳳
故據學海本排印

金華游錄

宋 東陽方 鳳韶卿撰

己丑歲正月。謝翱皋羽。方鳳韶卿。約遊洞天。十一日辛卯。韶卿攜子肖翁入邑。與皋羽及陳公凱君用弟公舉。帝臣。會韶卿夜賦詩。示同遊者。十二日壬辰。陰寒。韶卿拂曉取上洛之吳溪。過吳似孫續古。約俱行至橫溪。訪柳時聲父子。君用不至。帝臣從五路嶺先過門。皋羽繼至。會宿時聲居。十三日癸巳。枕上聞雨。是晚以雨。宿柳明府新居。各賦一首。十四日甲午。陰未曉卽行。午度太陽嶺。晚泊上坦。欲訪雙巖。鄭子有子有聞之。先至旅寓。邀宿陵雲山房。城友葉謹審言。適相遇於陵雲。約翌日同至赤松。是夕子有出家藏先資政北山先生遺墨。及久近諸賢書帖。共觀至夜分。韶卿書北山感雪竹賦。後皋羽亦題。十五日乙未。曉聞窗外葉聲。疑雨起而視之。則霽。旣飯。話良久。子有之姪復留飲。凝香閣。晚抵赤松。自源口入一里許。萬松轟翠。有亭跨中路。扁赤松山。舊樞密潛齋王公塾書。今往觀。唐元素易以他書矣。沿溪入橋亭。扁金華福地。郡人潘繼先篆。過橋入三門。勅寶積觀額。大中祥符元年所賜。與殿中四錦旛及獻花四木孩俱。今猶存。入門而右。有堂臨池上。爲濯纓堂。默成先生潘待制良貴書。入而爲松遊亭。又入而爲枕流亭。觀之前。爲臥羊山。卽皇初平叱石成羊處也。道士王元台。謝天與。款宿。謁冲應。養素二真祠。二真初起。初平兄弟也。松下有遇仙石。坐其上。相傳往年唐公李度有目眚。寓觀中。嘗憩茲石。遇二仙。問故。采草拂其目。遂明。且祝曰。後十八年。當相見。彬州及唐登第。授彬教。有二道士過之。唐不知省。道人曰。子亦記松下治。

眼時語乎。既而邀之，不知所適。方知爲二仙云。時韶卿病日甚，故道士言之爲詳。回宿王謝房，各賦上元遊赤松詩。十六日丙申，微陽。道士水竹唐元素、妙虛、王德厚、竹泉倪守約房中觀羊石，其詳具皋羽觀羊石記中。云：金華洞爲皇初平叱石處。予髫而聞之，髮種種，乃一至，而叱石處復不在金華洞。未至洞十五里，有山曰赤松，今爲寶積觀。觀旁祠二仙，二仙卽皇初平兄弟，是其處也。石故在山之巔，變怪恆恆，宛然如羊形，多爲樵牧及好事者取去。道士拾其餘，蓄觀中，余得借而觀者三處。其一在天井東，僅十數角，巔然羣伏，且起，狀無抵觸意。苔蒙茸若草藉地，可近而玩。其一竝曲池之岸，疊石爲山，參布伍列，犬牙其上。臥者十八，九伏者十七，抵者，蹶者，十五。履險而跋者十三，倚而齧，跪而乳者十一。若觀古彝尊之跡，于石形不求全而意自足。其一積小坻，位置加密，跂伏齧乳抵蹶，與前變態略同。復有拱而人立者，奇崛特甚，非前所有。道士易以他名，使不與羣羊伍。余曰：是不可易。左元放之遇曹瞞，其化而爲羊，與茲羊之化爲石，是或一物也。今而後觀茲石，馮而遊，若脫而休，茫乎日與之對，而泊不知所求，其有不復化爲是物乎？道士顧笑，衆皆沈寂。起立若植，以余言爲然。故書以啓後之遊者。其所觀後之三處，道士曰倪守約、唐元素、王德厚云。石去初平仙後若干年，爲樵牧好事所取。又若干年，爲樵牧好事所取。又若干年，道士悉能言之。于遊者非有繫，故不書。妙虛石旁有方竹一叢，蕭疏可愛。堂名蕭閒樓，有減筆隸物化二字，極佳。水竹留鱗，王倪各爲袁茗，入小桃源路口有小桃源，物外洗耳，三石刻，奇古。皆餘杭虞似良仲房八分書。未過橋爲物外亭，過橋有亭，泉上有臺，名滄浪，溪石皆磊砢，水激射爲峭峽，爲盤渦。道士徐南華攜酒歸，并

青窗王易所書趙元清夢游小桃源四時詩來。青窗卽故樞密王公之孫。名進思。官惠院。號淳齋。善書而好吟。以避世立兒子爲子。使出贅。復分田送其妻歸母家。而自爲道士于此。南華酌酒滄浪臺。擲陰下行。至巖扉閒。新構小亭。名別有天地。復酌亭上。巖扉有諸公題墨。新種桃梅夾道。道士周雲巖世昌。要會酌樓上。石泉之徒王德謙益之。攜琴鼓再行。午從觀右登山。行窮林巨石閒。觀丹龍及丹石。相傳某年丹光見石上。有道人養雞。見雞啄丹。取之。丹卽飛去。今立祠與庵。祠前舊有老樹竝。其中斷。倒架上半于其一。附著而生。下半則僵立不相接。狀甚怪奇。今爲改祠道士伐去。曾遊者以爲言。丹山而左。稍下有丹井。泉極甘冷。一徑出小桃源之上。抵二仙祠。回宿寶積觀中。西廡石刻赤松山三大字。李陽冰篆。偉甚。以赤字從大下作火。揭之有火災。故寘不用。而存其跡云。十七日丁酉雨。欲往三洞。不可。遂入城。泊祥符寺。待霽。取道智者以往。十八日戊戌雨。留祥符。臯羽有塔影霧中深之句。詔卿足之。十九日己亥陰。入寶鑿觀。謁星祠。登八詠樓。寶祐丙辰歲。郡守謝弈修。改創瀟齋。王堃書扁。今易以他書矣。時孿丁夫急。所帶奚奴不敢出市衢。詔卿自同臯羽訪芙蓉盛太博。共談世故。晚歸祥符。二十日庚子。新霽。約審言自蘭溪門會于北柵。詔卿父子續古。審言登七寶寺塔樓。拂塔院至道年碑石。遇且庵徐玉汝於盧士安卜肆。詔卿臯羽甚欲留訪諸老。以雨餘得霽。重于妨衆。遂行。旣出城。遇抑齋劉權院。梅居邵深道。成齋王玉成。于菱塘之東。王謝二道士自赤松來。西鹿田守僧懷玉留而相導。詔卿賦北山道中。衆客皆和。晡至智者寺。山路有亭。扁北山。唐乾元二年八月縉雲縣令李陽冰篆書。入而爲倚松亭。過橋有亭。扁靈源。小憩亭上。又

潛齋王公書靈源勝地四大字。真之雲堂後廡。寺僧莫之貴也。日夕過鳳凰山法清院。山形如鳳凰。舊爲法朗石晉開運二年爲國泰。今改法清。山西有一怪松。偃蹇如盤龍。院僧圓矩云。昔潛齋王公嘗護以闌楯。遊憩其下。是夜宿院中。二十一日辛丑。有徐生館法清。酒狂士也。曉起攜詩見贈。有鳳凰山上鳳凰翔之句。聯中又以畊田鹿。化石羊。爲對。臨別。密謂審言曰。余以鹿比僧。羊比道士。鳳凰比諸君子。審言途中述其語。衆皆絕倒。從法清而西。過故康懿泰國長公主墳園。未至觀半里。有歧徑行五十里。至金華觀。登山可至九龍寺。上有劉先生講堂。劉孝標讀書處也。三洞上爲朝真。中爲冰壺。下爲雙龍。三石扁皆飛帛書。立下洞口。觀有天下名山四大字。觀之左爲椒亭。所從入洞路也。以山下平地言之。此則山巔。然而迢遞寬衍。觀之前。居民成聚。則此乃洞天之趾爾。雙龍洞口。石室明淨。坐可三二百人。仰視石室紺碧。其隱約可名狀者。爲雲物。爲仙桃。爲道人。比肩而立。龍首見其左。而尾懸右。石壁上又懸石至地。獨黃色。俗呼呂先生藏身霞衣挂。其旁有北斗星窠。洞穴如螻蛄。水淙淙從中出。卽流入右偏。暗出洞外溪湖。衆束炬揭裳。偃偻踏水入內洞。凡三數丈。首背皆擦石。舊臥小舟而入。今敞漏閣水際。旣入。復虛曠如外洞。水從右流。莫測其淺深。執炬者一一相指告。見蜂窠石。水蛙石。石鐘。手槌之鐘聲。仙珠纍纍巖上。石門限雪。山前雪。山後雪。梁之皎然。仙笠懸巖石。石鼓。槌之鼓聲。有形蜿蜒。頭角髮尾。凡二。屈蟠隱見。爪尖皆白石如玉。所謂雙龍也。貓一。獅子一。頭足尾具。額有珠。大龜黑色。白蛇斜繞其背。首入甲下。奇甚。筆格一。霜崖粲如繁霜。有卷石。小窠指面大。有水正滴窠中。名仙人硯滴。候片時。纔一滴。仰視洞中。他無漏泉。獨此

爾浴室石檻三足蟾懸鐘寶蓋如名利講臺上所設而加高大海角虎蹲立雲霞五色欲飛極裏從暗處俯伏遠望洞口水中所從入處僅一小隙透明如十五夜月名仙人望月又大象足二小一仙桂水波石粼粼然大者如浪轉雪山後而左爲滑臺爲池爲田畦町高下可數仙人挂衣橫十數丈衣純素祛褻塵摺皆天成又仙人眠石方整可臥仙人帽日月二宮復從洞口踏水而出凡洞中所見不假一毫鑄鑿而形狀自然其妙處殆不可言也登山幾半里至中洞洞口視深處乃暗穴但聞潺潺水聲束數炬相後先若入井然稍斜向內衆魚貫而下石滑且險約三十丈至水簾自高巖噴出下有巨石盛之卽不知水之所往水簾出處前有懸石如鐘又如飛鳳視水簾以下復沈沈深黑人多不敢復入皋羽毅然揚炬而前詔卿續古從之由水簾之右轉而深入巨石無數回視水簾乃在目前愈入愈深下復無水有石筍入空曠中高可三四丈色瑩如玉從石筍而下極底有石室燥潔曾遊者留題在焉回至水簾漸可望明而上不如入之險也然不能深入則不得盡其奇來遊者率望水簾而止爾又登山二里詔卿父子皋羽續古倩兩山童買竹薪束炬至上洞入洞而右爲觀音洞從巖罅越石限而入展轉愈高攀援至觀音前其石像天成垂衣伸一足如土偶者但高入巖罅以炬燭之僅得其半而臂與面莫盡見也旁有潭深不可近名觀音井又名龍潭復路出從大洞正面而入歷三數坡陀其石上雲霞波浪霜雪屋室之類皆不減下洞所見洞口天日之光斜射洞中石崖上淡如月色奇甚內有石梁高挂深可二三十丈白龍護其左蒼龍護其右又入有天池深廣四畔峻壁不可下池之裏有崖如兩扉而啓其一極黑暗中遠望石扉啓處

天光下燭。蓋洞天漏明。而人莫知其處。名一線天。既隔天池。不得復深入也。雙龍洞口。題名石上。韶卿賦三洞云。金華北山三洞天。垂髻欲往金華顛。春風吹衣雨洗履。瘦筇忽拄蒼山煙。山高地平走幽澗。根絡石上森枏榦。步從飛橋瞰石洞。厓色閱世知幾年。風痕霧迹化異物。龍首昂左尾右旋。就中暗穴如蟻頤。急水瀉碧鳴渦絃。迤流束炬照徒涉。肩皆擦石行拳拳。水窮路夷內景得。以炬交燭窮幽元。細紋蹙波湧浪接。破彩凝雲飛霜鮮。大爲獅子虎犀象。瑣碎亦復蜂屯然。蜿蜒雙螭角尾具。一一玉爪擎蒼堅。窮龜負甲色深墨。長蛇白質相縈纏。鐘能鐘聲鼓能鼓。不假樅簾知誰懸。直檻斜檻藏福室。短畦長町移原田。青雲白霓五色霞。笑盡敗絮留丹鉛。中途經過最深宵。伏身低眺洞口泉。空明一隙隔遠見。秋蟾浴海光嬋娟。左巖褰衣頂黃旦。疊摺衆皴垂蹠躡。自餘神怪不可極。似鑿非鑿鑄非鑄。出登山腰叩中洞。外視石井聞潺潺。人深踏險思絕綆。長竿揭炬後且先。水簾可俯心爲掉。到此十九歸言過。嗜奇不憚歷磊砢。星以目故差輕便。翻身卻望水簾處。銀河天落懸吾前。常情疑復下百尺。積水定作神龍淵。石乾徑闊卻易涉。玉筍拔地修而圓。宜爲淵處乃爲屋。亦或摩挲題新篇。同遊疑我久未出。笑謂豈欲井底眠。林幽風起日已晚。猶睨高洞山之巔。薪蒸可買樵我導。不遠數里仍攀緣。傍從右壁入深圻。如鐵戶限瓊爲檐。儼然海相挂珠絡。熟視豈信非夸傳。左爲朝真正面入。便想笙鶴遨羣仙。雲霞波濤仙衣裳。奇詭豈必下洞專。歛然修梁架巖起。左右蒼白龍形全。望中極底勝漆黑。雙扉隱隱啓半邊。天光一道燭扉內。知此明罅從何穿。窗深壁峭不可往。安得插羽如飛鳶。嗟余茲遊尙索俗。身所驟歷辭難宣。但思乞水學坡老。洗眼看字

消餘年。是夕，僧懷玉同歸西鹿田寺止宿。寺丈室後，有奇石峭立，罅坼間可行。林泉幽勝特甚。默成先生潘公大書其處云：余往來南北南山，餘二十年，獨未曾至鹿田。紹興七年四月十七日，同智者長老法鈺來于崎嶇險隘之中，得虛曠寬閒之地，修篁喬木，巨石瀑泉，氣象雄偉，此蓋未之見。不獨甲于金華也。自是評吾鄉山水，以此爲第一云。其丈室遂榜第一軒，上爲思賢閣。是夜聽雨軒中。二十二日壬寅曉霽，過東鹿田寺，廊廡列詩石，內有葉丞相衡集杜五言四韻，其二聯云：水花分塹弱，山木抱雲稠。更宿招提境，還從惠遠遊。又僧舍壁間有郡倅金陵吳琳題詩，中一聯云：雲暗雨來疑是夜，山深寒在不知春。潛齋王公嘗和，其後行數里，至潛齋所營山橋，穆陵御書山橋書堂四大字，下有懶瓚巖，巖上有亭，亭之西有石筍，又旁巖臨溪爲亭臺，遠望州城，城中之塔，鑽小雙溪如篆紋，路口有亭，扁北山。今亭臺皆蕪廢。既下山，王謝道士登山取別，往歸赤松。至潛岳寺前，帝臣審言同入城，詔卿、皋羽、續古、肖翁取赤松源口虎頭巖下，道遇雨，抵上坦旅宿。二十三日癸卯曉霽，近午度太陽嶺，晚宿柳時聲居。聖傳之蘭溪，留詩以待。續古先歸。二十四日甲辰，過松巖陳粹翁，午與皋羽別。晚復雨。二十五日乙巳，詔卿父子回抵吳氏書塾，客有問金華勝遊者，詔卿以詩敘其槩云：赤松上下雨霏微，八詠樓頭重拂衣。西港晴來汀草長，北巖幽處洞泉飛。風敲定磬鹿春過，月滿丹臺鶴夜歸。歷覽因知古詞客，盛誇雲夢未全非。皋羽歸後，作金華洞人物古蹟記。